



## Assemblée générale ordinaire du 3 avril 2014

### Allocution du président Fernand Muller

Gudden Owend

Dir Dammen an Dir Hären,  
Léif Kolleginnen a Kollegen,

Merci, dass dir haut den Owend an d'Generalversammlung vun der AGC komm sidd.

Wéi déi Jore virdrun sinn ech besonnesch frou haut och nees eis trei Grënnungsmitglieder hei begréissen ze kënnen: déi Häre Maurice Schmitz a Pierre Trausch. 2015 ginn et scho 40 Joer, dass si d'AGC gegrënnt hunn.

Begréisse wëll ech awer och eise fréiere President de Michel Schmitz, awer och all aner Ancienën a fréier Memberen aus dem Bureau exécutif an aus dem Comité vun der AGC.

Ech si frou och eise Kolleg Romain Wolff hei kënnen ze begréissen. Hie ass een aus eise Reien a gouf elo kierzlech nees vum Comité fédéral fir e weidert Mandat vun 3 Joer als Generalsekretär vun der CGFP gewielt.

Entschëllegt hu sech den Här Georges Muller, Direkter vun der Chambre des fonctionnaires an den Här Marc Poos, Beamten an eiser Berufschamber.

D'lescht Joer hate mir eis Generalversammlung zu Dummeldeng den 9 Abrëll.

Eng Generalversammlung huet et esou un sech, dass een op d'Evenementer vun deene leschten 12 Méint ageet. Abee 2013 war e Joer dat garantéiert keen heibannen sech esou virgestallt hat. Et louch scho méi laang an der Loft an den 10. Juli war Schluss.

Wéinst den Affären kouw et zum Broch vun der Regierung an zu virgezunnene Chamberwalen. Mir kruten eng nei Regierung an natierlech en neie Regierungsprogramm fir déi nächst 5 Joer.

Um gewerkschaftleche Plang war dat lescht Joer eigentlech e verluerent Joer. Wat wëll ee maache wann op eemol keng Regierung méi do ass ?

An de leschte Jore war de Verschläiss u Ministere vun der Fonction publique besonnesch grouss. No de Walen 2009 hat den Här Biltgen den Här Wiseler ofgeléist. Enn Abrëll 2013 huet d'Madame Modert den Här Biltgen ofgeléist. Si war Ministesch vun der FP bis den 10 Juli, den Dag vun deem memorablen Debat iwver de Geheimdéngscht an der Chamber.

Als AGC hate mir et awer färdeg bruecht an deeër ganz kuerzer Zäit eng Entrevue bei der Mme Modert ze kréien. Den Thierry Ries kënnt nach drop zrëck. De 4. Dezember gouf déi nei Regierung vereedegt an den Här Kersch krut de Ressort vun der Fonction publique. De Minister wiesselt, mä d'Beamte bleiwen a suerge fir d'Continuitéit. Oder och net, well elo huet et och den Här Neyens erwëscht, e Monument aus der FP. Awer kee Frënd vun de Redakteren ...

Zënter dem Regierungswiessel gouf vill iwver Beamten a Politik geschwat. Dozou kann ee soen, dass de Beamten (esou wéi de Minister) fir d'Leit alleguer muss do sinn. De Beamten däerf net politesch sinn, well dat passt net bei d'Impartialitéit op déi e jo vereedegt ass. Duerch hire Statut stinn d'Beamte si mat 2 Féiss um Buedem, loossen sech vu kenger Faarf blenden a maachen hir Aarbecht.

Mä de Beamten ass natierlech drun intresséiert wat am Land esou ofleeft a wat op hien duerkomme kann.

Fir d'éischt kuckt hie wat an senger jeweeleger Verwaltung geplangt ass.

Duerno kuckt hie wat an der Fonction publique geplangt ass, an eisem Fall besonnesch wat mat der Carrière vum Redakter geschitt.

An zum Schluss ass sécher all Beamten och drun intresséiert wat bei de Pensiounen nach alles geplangt ass.

Mä iwver all déi Punkten ass am Programm vun der neier Regierung net vill ze liesen.

D'Jorhonnertreform an der Fonction publique (wéi déi vieregt Ministesch se genannt huet) soll duerchgezu ginn an dozou gehéiert jo bekanntlech och den Accord salarial, deen de 15. Juli 2011 ! ënnerschriwwen gouf. Jo dir hutt richteg héieren et war 2011 an et war geduecht fir d'Joren 11, 12 an 13. Déi Jore si Geschicht an de Conseil d'Etat huet eis net d'Gefill ginn wéi wann dee ganze Pak Projeten elo séier kënnt gestëmmt ginn.

Mä ëmmerhin, am Budgets-Projet fir dëst Joer steet den Accord salarial 2014 dran mat engem Betrag vun 16,597 Mio. Dat neit Zil ass elo de Vote nach virum Enn vun dësem Joer.

Iwver déi neisten Entwécklungen bei de Reformprojeten gi mir herno vun eisem Generalsekretär am Detail informéiert.

Och ënner der neier Regierung heescht et bal al Dag: Et muss gespuert ginn!

Dobäi kann een zu de Staatsfinanze just soen, dass se Héichkonjunktur hunn. Dee flotten Tableau an der leschter Nummer FP compact vun der CGFP huet dat schéin illustréiert mat ëmmer méi héijen Uergelspäifen. Dat sinn Dramresultater fir sougenante Krisejoren.

Vergiessen däerfe mir dobäi net firwat dat esou ass. Mir alleguer hu kräfteg dozou bäigedroen, mä wien erënnert sech nach drun wat de Budget 2013 bruecht huet oder besser gesot, geholl huet.

- 4 Unités kilométriques sinn ewechgefall
- D'Solidaritéitssteuer ass vu 4% op 7% eropgaangen
- De maximale Steiersaz ass vun 39 op 40% eropgaangen
- De Barème ass fir déi x-te Kéier net un d'Inflatioun ugepasst ginn an dee betreffenden Artikel am Steiergesetz ass carrément ofgeschaaft ginn.

Och de Budget 2014 gëtt eemol méi net inflatiounsberengegt, eppes wat esouguer déi franséisch Regierung dëst Joer gemaach huet. Mä hei am Land gi scho jorelaang direkt Steieren op der Inflatioun opgehewen.

Mam Budget 2014 (Iwwergangsbudget) lafen awer all déi Austeritéits-Moosname vun 2013 automatesch weider. Dat waren 2013 +/- 550 Milliounen an dat ginn och 2014 +/- 550 Milliounen. An et ass ze fäerten dass fir 2015 Schlëmmeres op eis duerkënnt.

Wann d'Beroderfirma McKinsey un deem Budget matschafft da musse mir eis waarm undoen. Well dat sinn d'Verfechter vum schlanke Staat.

McKinsey steet fir Personalofbau, Käschtereduzéierung, Produktivitéitssteigerung, Bezuelen no Leeschtung an Out-sourcing.

Op der anerer Säit gëtt domat d'Méiglechkeet geschaaf fir de Betriber nei Steiercadeauën ze maachen. Dee Steiererausfall kréien d'Personnes physiques ze droen, also och mir Staatsbeamten. Fir d'Steierreform 2017 déi 2016 préparéiert gëtt besteet d'Gefor, dass d'Gesamtsteuerlaascht nach méi op de Bockel vun de Personnes physiques geluede gëtt, Stéchwuert: Ofschaafe vu verschiddene Steier-Abatementën.

Et wier jo schéin wann d'Steierlaascht gerecht verdeelt wier a wann all Revenuën an all Beneficer géifen deklariert ginn an d'Steieren dorop och géife bezuelt ginn. Schéi wier et.

Mä där grouss a kleng Hoenessen där ginn et och hei am Land. Leider huet d'Bekämpfe vun der Fraude fiscale zu Lëtzebuerg nach keng Regierung intresséiert...

Et gëtt deemno och keng Selbstanzeige – héchsten eng Fehlanzeige !

Vill méi einfach ass et natierlech d'TVA ëm 13,33% ze héijen. Jo dir hutt richteg héiere vu 15 op 17 Prozentpunkten, dat ass eng Augmentatioun vun 13,33 %. An

d'Déngschtleeschung oder d'Endprodukt gëtt 1,74% méi deier. Méi sozial ongerecht geet et net ...

Dat wierkt sech och nach op déi schonn héich Präisser vum Logement aus. Op deem Gebitt gëtt d'Situatioun ëmmer méi schlëmm. De Bauterrain gëtt ëmmer méi kleng an ëmmer méi deier, an d'Banke ginn ëmmer méi virsichteg beim Léinen. Neierdénks ginn souguer 2 Paie vun enger jonker Koppel Redakteren net méi duer fir en Haus ze kafen.

Dat hu mir der Politik ze verdanken déi dora besteet fir mat Steiercadeauën ëmmer méi räich Leit op Lëtzebuerg ze zéien. Déi Leit kommen net op Lëtzebuerg fir Steieren ze bezuelen, well si wëssen haut schonn, dass de Secret bancaire fir d'Résidentë bestoe bleift.

Dat ass alles net gutt fir déi sozial Cohésion am Land.

Wann d'Bevëlkerung zu Lëtzebuerg all Joer ëm 10.000 Unitéiten eropgeet, da muss och d'Verwaltung matwuessen. Wann de Finanzminister mengt et misst elo emol beim Rekrutement vu Beamte gespuert ginn, dann ass dat e falscht Zeechen. Doduerch hëllt Qualitéit vum Service public of an déi jonk Leit fanne keng Plaz ...

An de leschte Joren hu besonnesch déi iewescht Carrière beim Staat keng gutt Figur gemaach. Do ginn et der déi kréien eng Pai ouni ze schaffen, aner leiden ënner enger totaler Amnésie, an nach anerer demissionnéieren einfach, well se mat hirem Minister net eens ginn...

Dat alles gëtt et an eiser Carrière net. D'Redakteren déi schaffen, well d'Kéip vun den Dossieren ginn ëmmer méi héich.

An de leschten 12 Méint sinn emol nach jonk oder manner jonk Redakteren an eiser Carrière agstellt ginn. 47 Kandidaten hunn de Staatsconcours vum Juli gepackt an 53 de Concours vum Dezember. Ech wees awer net ob se all ugetruede sinn, well et ware wéi ëmmer vill Kandidaten derbäi, déi eng Formation universitaire hunn. Dat lescht Joer sinn och nach 22 Redakter-Plazen iwwer d'Mobilitéitsgesetz ausgeschriwwen ginn, also duerch de "Changement d'administration".

Dat wäert dann dëst Joer an d'nächst Joer net méi de Fall sinn ...

Ech wëll dës Allocutioun ofschléisse mat engem Bléck op d'AGC am Joer 2015. An der Generalversammlung 2015 stinn nees Walen um Ordre du jour wou de Comité vun der AGC neigewielt gëtt (all 3 Joer). D'nächst Joer sinn och nees Wale fir d'Chambre des fonctionnaires (all 5 Joer), e ganz wichtege Rendez-vous fir d'AGC well d'Redakteren an där Chamber e relativ grouse Groupe duerstellen.

Voilà - Domat sinn ech um Enn vu menger Allocutioun ukomm.

Ech soen iech Merci